

清史稿

本紀十六之十九

第六册



1

2

3

4

5

6

7

8

9

10

清史稿

本紀十六

仁宗本紀

仁宗受天興運敷化綏猷崇文經武孝恭勤儉端敏英哲睿皇帝諱顒琰高宗第十五子也母魏佳氏追尊孝儀皇后乾隆二十五年十月初六日生五十四年封嘉親王六十年九月策立爲皇太子高宗將傳位焉以明年爲嘉慶元年嘉慶元年丙辰春正月戊辰朔舉行內禪上侍高宗徧禮於堂子奉先殿壽皇殿高宗御太和殿授璽上卽位尊高宗爲太上皇帝訓政頒詔天下賜宴宗藩庚戌立皇后喜塔拉氏寧壽宮舉行千叟宴太上皇帝蒞焉九十以上者召至御座賜卮酒如故事辛酉祈穀於上帝癸亥上奉太上皇帝賜廷臣宴於正大光明殿凡賜宴皆如之辦理苗疆大學士福康安等奏攻克朗坡進攻平隴湖北枝江宜都教匪起二月丁丑朔釋奠先師孔子戊寅祭社稷庚辰初舉經筵辛巳勅甘肅貴德廳建文廟戊子春分朝日於東郊己丑上御乾清門聽政園居則御勤政殿以爲常己亥湖北當陽教匪起戕官西安將軍恒瑞率兵二千

勦之辛丑祭歷代帝王廟丙午湖北巡撫惠齡奏獲教匪聶傑人三月庚戌停四川續徵軍需銀兩辛亥上耕藉田四推壬子上奉太上皇帝謁陵丁卯車駕還京己巳皇后祀先蠶癸酉恒瑞奏收復湖北竹山壬申留保住免以烏爾圖納遜爲理藩院尙書富銳爲綏遠城將軍永慶爲蒙古都統夏四月丙子朔時享太廟命宜綿永保恒瑞孫士毅等分勦湖北教匪辛巳常雩祀天於圜丘以勦來鳳功晉四川總督孫士毅三等男勅伊犁貢馬由草地行丁酉上侍太上皇帝祈雨黑龍潭是日雨庚子賜趙文楷等一百一人進士及第出身有差五月戊申詔額魯特來京有出痘者嗣後由草地赴熱河覲見辛酉祭地於方澤壬戌上奉太上皇帝避暑木蘭乙丑以富綱爲漕運總督壬申大學士貝子福康安卒於軍六月乙亥朔日有食之以魁倫爲閩浙總督朱珪爲兩廣總督以紀昀爲兵部尙書金士松爲禮部尙書沈初爲左都御史丙子調福昌爲福州將軍以明亮署廣州將軍丁丑除山西代州三州縣水冲田賦戊寅和琳奏獲苗匪石三保解京誅之癸巳江南豐汎河決秋七月辛亥明亮奏勦平孝感縣

教匪大學士四川總督二等男孫士毅卒於軍八月丙子以雨停秋獮壬寅和琳卒於軍命明亮鄂輝接統軍務九月乙巳車駕還京冬十月戊寅上萬壽節詣太上皇帝行禮禮成受廷臣賀己卯以董誥爲大學士王杰以足疾疏辭軍機處南書房禮部事允之命沈初爲軍機大臣辛巳贈征苗陣亡提督花連布太子少保予世職丙戌調沈初爲兵部尙書以紀昀爲左都御史十一月庚戌豐汎河工合龍復決予湖北死事巡檢王翼孫訓導甘杜典史浦寶光世職甲子冬至祀天於圓丘乙丑江西巡撫陳淮有罪逮問遣戍己巳以湖北教匪偷渡滾河入秦隴永保職逮問以惠齡統其軍十二月戊子湖南苗匪平封明亮伯爵額勒登保侯爵及德楞泰等世職有差庚子祫祭太廟辛丑上奉太上皇帝御太和殿賜宴朝正外藩是歲免順天江蘇山西湖南福建等省三十九廳州縣災賦逋賦各有差會計天下民數二萬七千五百六十六萬二千四十四名口穀數三千七百二十萬六千五百三十九石一升二合七勺朝鮮入貢二年丁巳春正月丁卯貴州南籠种苗夷婦王囊仙作亂命總督勒保勦之庚

午觀成奏四川教匪徐添德侵擾達州東鄉命總兵朱射斗等勦之二月癸酉上御經筵江南豐汛復報合龍戊寅皇后崩奉太上皇帝誥素服七日不摘纓廷臣如之近臣常服不挂珠辛巳叙景安勦擒教匪功晉三等伯戊戌冊諡大行皇后曰孝淑皇后惠齡奏獲匪首劉起等解京誅之三月戊申上謁西陵丁巳還京癸亥以劉墉爲大學士調沈初爲吏部尙書朱珪爲兵部尙書以福長安慶桂爲滿洲都統德楞泰爲漢軍都統巴克坦布慶成奏由應山追賊入豫查明賊首李全王廷詔姚之富均在其內諭令擒捕夏四月壬申設湖南鎮鎮總兵官改保靖土縣爲流官辛巳追贈侍郎奉寬太師禮部尙書上受書師也五月戊辰上奉太上皇帝避暑木蘭己巳惠齡奏教匪姚之富等由白馬石搶渡漢江入川詔罷總統慶成恒瑞等各降官以宜綿爲總統明亮德楞泰爲幫辦六月癸酉勒保奏勦辦南籠种苗迭克水烟坪卡子河等處得旨亟將苗首仙姑等擒獲閏六月庚子吉慶奏克西隆州亞稿苗寨丙午勒保奏進克普坪槍斃匪首解南籠圍詔獎紳民堅守危城深明大義改南籠府爲興義府勒

保續報解黃草壩圍滇黔路通壬戌軍機章京吳熊光戴衢亨均加三品卿銜
與侍郎傅森一體在軍機大臣上學習行走秋七月己巳永定河決己卯命喀
什噶爾英吉沙爾二回城儲糧備荒癸未都統巴克坦布卒於軍乙酉免四川
運送軍糈奉節六州縣明年額賦八月甲辰永定河合龍丙辰范宜恒卒調沈
初爲戶部尙書紀昀爲禮部尙書己未大學士誠謀英勇公阿桂卒丙寅上奉
太上皇帝還京九月戊辰勒保奏攻克种苗賊巢獲賊首王囊仙等解京誅之
封勒保三等侯丁丑上臨奠故大學士阿桂甲申以蘇凌阿爲大學士李奉翰
爲兩江總督庚寅詔宜綿勒保秦承恩景安等分募鄉勇入伍勦賊癸巳詔曰
聞賊每逼平民入夥迎拒官軍官軍報捷所稱殺賊多係平民非眞賊也故曰
久無功領兵大員尙其設法解散勿令玉石俱焚甲午以湖北恩施利川四川
奉節士民奮勇殺賊再免一年錢糧冬十月戊戌明亮德楞泰請廣修民堡以
削賊勢詔斥其迂緩丙辰乾清宮交泰殿災辛酉命勒保總統四川軍務十一
月丙寅朔予陣亡散秩大臣佛柱護軍統領阿爾薩朗世職十二月戊申以康

基田爲江南河道總督司馬駒爲東河河道總督予陣亡總兵明安圖副將會攀桂伊薩納等世職甲子祫祭太廟是歲免順天湖廣陝西雲南甘肅等省五十七州縣災賦有差朝鮮琉球暹羅入貢

三年戊午春正月庚午以梁肯堂爲兵部尙書胡季堂爲直隸總督甲申調勒保爲四川總督乙丑額勒登保奏獲賊首覃加耀上責其遲延奪額勒登保爵職並以疏防奪明亮德楞泰爵職奪舒亮穆克登阿職籍其家均隨軍自効二月丁未上釋奠文廟臨雍講學以鄂奇泰爲黑龍江將軍慶霖爲江甯將軍辛亥柯藩烏爾圖納遜坐縱陝賊渡漢入楚褫職壬子以吳省欽爲左都御史乙卯命內閣學士那彥成在軍機處學習行走三月丁丑德楞泰奏追勦賊首齊王氏姚之富投崖死予明亮副都統銜己丑以勦賊遲延褫觀成劉君輔職以富成爲成都將軍夏五月丙寅免福建全省遠年逋賦己巳截留江西漕糧接賑山東曹縣等十三州縣被水災民甲戌上奉太上皇帝避暑木蘭六月己酉以勦賊遲延盡奪德楞泰爵職予副都統銜自効甲寅雲貴總督二等男鄂輝

卒秋七月庚午富楞泰卒以德格楞貴爲寧夏將軍以兩停秋獮八月以獲教匪王三槐功晉勒保及和坤公爵福長安侯爵己酉張誠基奏江西西甯州教匪作亂勦平之九月癸亥上奉太上皇帝還京己卯祀明總制袁崇煥於賢良祠冬十月庚子新建乾清宮交泰殿成十一月丁亥左都御史舒常卒十二月乙巳惠齡奏獲賊首羅其清羅其書戊午祫祭太廟是歲免陝西貴州等省四十八廳州縣災賦有差朝鮮琉球暹羅入貢

四年春正月壬戌太上皇帝崩上始親政丁卯大學士和坤有罪及尙書福長安俱下獄鞫訊晉儀郡王永璇親王貝勒永璘爲慶郡王綿億封履郡王奕綸奕紳在上書房讀書綿志等各封賞有差詔中外陳奏直達朕前不許副封關會軍機處命成親王永理大學士董誥尙書慶桂在軍機處行走沈初免直成親王永理管戶部丁丑和坤賜死於獄福長安論斬己卯特詔申明軍紀命勒保爲經略明亮額勒登保爲參贊并查詢劉清居官具實保奏吳省欽免以劉權之爲左都御史以保甯爲大學士仍管伊犁將軍慶桂協辦大學士書麟爲

吏部尙書松筠爲戶部尙書敘斬賊首冉文儔功獎敘惠齡德楞泰丙戌宜綿解任以恒瑞爲陝甘總督丁亥贈原任御史曹錫寶副都御史廕一子召前內閣學士尹壯圖來京二月己丑以松筠爲陝甘總督布彥達賚爲戶部尙書辛卯詔曰自教匪滋事以來迫脅良民焚毀田舍民非甘心從賊欲逃無歸歸亦無食亟宜招撫解散而非空言所能收效應如何緩輯安插令勒保詢之劉清及其他良吏籌議良法俾可施行速具以聞甲午弛私售和闐玉禁辛丑秦承恩以貽誤軍事褫職逮問李奉翰卒以費淳爲兩江總督乙巳復宗室鄉會試例增部院郎官宗室額缺壬子釋回徐述夔王錫侯子孫緣坐發遣者丁巳錄用故大學士朱軾孫嘉淦子孫三月己未朔蘇凌阿免以慶桂爲大學士成德爲刑部尙書傅森爲左都御史庚申戶部尙書沈初卒以范建中爲戶部尙書癸亥以書麟爲閩浙總督協辦大學士甲子調慶霖爲福州將軍福昌爲江甯將軍戊辰許直省道員密摺上奏庚午解景安任以倭什布爲湖廣總督吳熊光爲河南巡撫丙子額勒登保奏勦滅教匪蕭占國張長更上嘉之予二等男

敘獎裨將朱射斗楊遇春等戊寅定侍衛軍政壬午追贈皇四兄履端郡王永
城爲親王皇七兄悼敏皇子永琮爲哲親王皇十二兄永璣爲貝勒癸未勒保
奏勦滅教匪冷天祿得旨旬日之內連翦三酋深爲可嘉額勒登保晉一等男
免河南被匪之鄧州二十州縣新舊額賦甘肅布政使廣厚奏勦斃賊目張世
龍夏四月己丑朔欽天監言四月朔日月合璧五星聯珠上曰躔度偶逢兵
戈未息何足言瑞予尹壯圖給事中准回籍養親丙申恭上大行皇帝尊諡禮
成頒詔覃恩丁酉免陝西被賊之孝義等三十五廳州縣新舊額賦己亥免四
川被賊之奉節等三十六廳州縣新舊額賦辛酉詔遵奉皇考勅旨於庚申辛
酉舉鄉會恩科癸丑賜姚文田等二百二十人進士及第出身有差丙辰以慶
成爲成都將軍五月戊午朔停本年秋決甲子免湖北被賊之孝感等四十七
州縣衛新舊額賦庚午江蘭罷以初彭齡爲雲南巡撫庚辰以傅森爲兵部尙
書阿迪斯爲左都御史辛巳克勤郡王恒謹以不謹削爵甲申以董誥爲大學
士丁亥勅費淳訪劾貪吏詔免伯德爾格回民增納金錢及葡萄折價六月己

丑增設步軍統領左右翼總兵官庚寅詔曰朕聞湖北隨州未被賊擾因民人掘溝壘山足資捍禦民間卹堡儘可照辦勒保松筠吳熊光即曉諭百姓知之辛卯吳熊光吳興請加徵河工稽料運費銀得旨申飭下部議處庚戌卹陝西陣亡總兵官保興等世職秋七月辛酉調山西兵三千赴湖北盛京兵三千額勒亨額統之赴四川勦賊癸亥勒保奏獲賊首包正洪予朱射斗騎都尉世職壬申經略勒保以玩誤軍務奪職逮問以明亮爲經略魁倫爲四川總督乙亥削景安伯爵遣戍伊犁免甘肅被賊隴西等四十八州縣新舊額賦辛巳停中秋節貢八月己丑富俊免以興奎爲烏魯木齊都統壬辰調盛京兵二千吉林黑龍江兵各一千赴湖北勦賊癸巳以長麟爲雲貴總督乙未勒保奏德楞泰生擒賊目龔文玉給騎都尉世職癸卯罷明亮經略命額勒登保以都統銜爲經略乙巳命修撰趙文楷中書李鼎元冊封琉球國王尙溫己酉慶成永保以督軍不力逮問命那彥成往陝西督辦癸丑編修洪亮吉致書成親王私論國政遣戍伊犁九月丙辰朔陣亡貴州副將孫大猷世職丙寅怡親王永琅薨

庚午大行梓宮發引上恭送啟鑾庚午葬高宗純皇帝於裕陵癸酉還京甲戌高宗純皇帝孝賢純皇后孝儀純皇后升祔太廟頒詔覃恩辛巳故湖廣總督畢沅坐濫用軍需削世職奪廕官壬午明亮以勦賊不力罷參贊禡都統予副都統勦賊冬十月壬辰調朱珪爲戶部尙書劉權之爲吏部尙書范建中爲左都御史丁酉明亮奏獲賊首張漢潮湖北道員胡齊崙以侵盜錢糧處斬壬寅德楞泰奏獲賊首高均德高二子德楞泰二等男丁未成親王永琨免值軍機處命傅森仍爲軍機大臣辛亥命廷臣保舉賢良壬子勒保論斬解京監候十一月甲子故超勇公海蘭察子公安祿於四川勦賊陣亡詔優卹之名其子恩特赫默扎拉芬襲超勇公癸酉免直隸積年逋賦戊寅興肇慶成以帶兵不力遣戍賞額勒登額銀一萬兩德楞泰銀五千兩庚辰冬至祀天於圜丘奉高宗純皇帝配享頒詔覃恩十二月壬辰漕運總督蔣兆奎以率請加賦濟運罷卹陣亡副將丁有成德亮等世職甲午福甯以殺降報捷景安以縱賊殃民俱褫職逮問丙申額勒登保奏獲教匪王登廷辛丑姜晟奏獲湖南苗匪吳陳受得

旨嘉獎加太子少保壬子禋祭太廟是歲免河南湖北被兵六十七州縣新舊額賦徵兵經過直隸河南湖北田賦又除江蘇湖北各一縣坍田額賦吉林三姓黑龍江雲南石屏州災賦普免天下積年逋賦朝鮮暹羅入貢

五年庚申春正月甲寅朔上謁陵丙辰詣裕陵行初期祭禮庚申上還京命額勒登保勦辦陝西教匪德楞泰魁倫勦辦四川教匪辛酉以松筠爲伊犁將軍仍留陝西勦賊調長麟爲陝甘總督以玉德爲閩浙總督阮元爲江蘇巡撫壬戌詔清查庫欸從容彌補勿以嚴急而致累民士金松卒以張若淳爲兵部尙書辛未祈穀於上帝奉高宗純皇帝配享解倭什布任以姜晟爲湖廣總督移松筠勦湖北賊戊寅以景燿爲黑龍江將軍二月丁亥命那彥成參贊甘肅軍務辛卯以汪承霈爲左都御史癸巳勅新疆鑄乾隆錢壬寅卹四川陣亡副將關聯陞等世職丁未追論縱賊諸臣秦承恩宜綿戍伊犁庚戌予告大學士蔡新卒三月庚申上謁陵辛酉解七十五任逮京治罪甲子清明節上行敷土禮乙丑阿迪斯以擁兵玩誤逮問起勒保護成都將軍丁卯上幸南苑德楞泰奏

截勦渡江教匪獲匪首冉添元晉三等子壬申上謁西陵乙亥還京辛巳甄錄
賢良祠大臣後裔以縱賊渡嘉陵江復過潼河奪魁倫職逮問以勒保署四川
總督起明亮藍翎侍衛從軍夏四月癸未朔日有食之乙酉阿迪斯遣戍伊犁
以德楞泰爲成都將軍庚子雲南猺夷平加書麟太子太保閏四月甲寅命刑
部查久禁官犯及禁錮子孫與久戍者寬減之丙午上步禱祈雨乙卯釋洪亮
吉回籍丙辰釋安南人黎侗等於獄安置火器營給月餼是日雨丙寅卹四川
陣亡提督達三泰世職戊辰以那彥成不任戎務罷直軍機處召回京五月壬
戌朔夏至祀地於方澤奉高宗純皇帝配享己丑經略額勒登保以勦辦匪目
劉允恭等功晉三等子丙午那彥成到京奏對無狀降爲翰林院侍講六月壬
戌額勒登保奏獲賊首楊開甲丁卯以張若淳爲刑部尙書汪承霈爲兵部尙
書馮光熊爲左都御史甲戌賜魁倫自盡戍其子扎拉芬於伊犁秋七月辛卯
命右翼總兵長齡統吉林黑龍江兵赴湖北協勦教匪琅玕奏青苗楊文泰作
亂勦平之馬慧裕奏獲傳教首犯劉之協解京誅之丙申禮部尙書德明卒以

達椿爲禮部尙書己酉額勒登保奏獲賊目陳傑八月丙辰固原提督王文雄
勦賊陣亡予三等子九月壬午上謁東陵戊子還京丁未卹四川陣亡副將李
錫命世職冬十月戊辰胡季堂卒以姜晟爲直隸總督書麟爲湖廣總督琅玕
爲雲貴總督十一月乙酉睿親王溥穎薨己亥卹陣亡革職將軍富成等世職
十二月甲寅陝西教匪徐添德竄湖北湖北教匪冉學勝竄陝西降責德楞泰
勒保等丁巳德楞泰奏獲教匪楊開第等丙子祫祭太廟是歲免順天江蘇四
川雲南甘肅等省七十廳州縣災賦及兵差經過坍田額賦各有差朝鮮琉球
入貢

六年辛酉春正月壬午以傅森爲戶部尙書明安爲步軍統領辛卯遣少卿窩
星阿裘行簡犒額勒登保德楞泰軍丁酉德楞泰以勦山陽教匪功復一等子
甲辰德楞泰奏獲賊首高二王儒乙巳勒保奏獲黃藍白三號賊目徐萬富等
二月乙卯勒保奏獲賊首王士虎丙辰書麟奏明亮獲賊目卜興昂戊午賜賢
良後裔尙書魏象樞六世孫煜尙書楊名時曾孫景曾巡撫徐士林孫從旭舉

人戊辰上謁陵行敷土禮壬申上還京改湖廣提督爲湖南提督置湖北提督駐襄陽改襄陽鎮總兵爲鄖陽鎮總兵癸酉傅森卒以成德爲戶部尙書軍機大臣乙亥額勒登保奏獲賊首王廷詔三月庚辰詔被賊裹脅匪徒多係良民凡投出者悉貸其死軍前大臣仰體朕意廣爲宣示務使周知卹陣亡總兵多爾濟扎布李紹祖等世職丁酉賜賢良後裔大學士李光地四世孫維翰尙書湯斌四世孫念曾舉人巡撫傅宏烈六世孫縣丞徵璫知縣己亥詔朕將謁陵春苗暢發令大臣監護民田勿許踐踏禾苗敘江西士民協勦教匪劉聯登功改西甯州爲義甯州辛丑上謁陵乙巳行釋服禮夏四月丁未朔上還京己未以四川民人輸資急公免遂甯等八十六廳州縣明年額賦辛酉冊立皇后鈕祜祿氏壬戌協辦大學士湖廣總督書麟卒以吳熊光爲湖廣總督德楞泰奏獲賊首張允壽丙寅以獲王廷詔高二馬五功晉額勒登保二等子楊遇春騎都尉戊辰以兩廣總督吉慶協辦大學士辛未賜顧皋等二百七十五人進士及第出身有差五月己卯賜賢良後裔大學士王熙曾孫元洪舉人甲申上祭